

Christianum neminem reluctari, adulterum esse, qui vel diu languente, vel diu absente, vel continenter vivere cupiente sua uxore alteri commixtus est foeminæ. Sic ergo et dimissa adultera, adulter est cum altera : quoniam non ille, aut ille; sed, « Omnis qui dimittit uxorem suam, » et ducit alteram, moechatur<sup>1</sup>. » Quapropter si a conjugali vinculo immunis minus appetitur vita sanctorum, exhorreatur poena moechorum : et timore saltem frenetur concupiscentia, si amore non eligitur continentia. Si enim ubi est timor, operetur labor; ubi erat labor, erit et amor. Non enim confidendum est de nostris viribus : sed oratio adjungenda conatibus, ut impleat bonis, qui deterret a malis.

XIV. Respondeamus etiam ad illud, ubi putas maritos ad puniendas adulteras sine ulla miseratione compelli ; cum volunt eas mori, si eis viventibus non licet eis alteras ducere. Quam crudelitatem volens exaggerare dixisti : « Non mihi videtur, amantissime pater, hic divinus esse sensus, ubi benignitas et pietas excluditur. » Ita istud dicis, quasi propterea mariti parcere debeant adulteris foeminis, quia licet eis alteras ducere ; ut si non licet, non parcant ut liceat. Quinimo propterea debent peccatricibus præbere misericordiam, ut et ipsi pro suis peccatis misericordiam consequantur. Et multo magis hoc eis faciendum est, qui dimissis uxoribus adulteris cupiunt vivere continenter. Tanto quippe debent esse misericordiores, quanto volunt esse sanctiores : ut et ad castitatem in se ipsis servandam divinitus adjuventur, dum castitatem ab uxoribus violatam nec ipsi humanitus ulciscuntur. Et maxime vox illa dominica est eis in memoriam revocanda, « Qui sine peccato est, prior in illam lapidem jaciat<sup>2</sup>. » Non : Qui sine ipso peccato est, quoniam loquimur de

<sup>1</sup> Luc. xvi, 18. — <sup>2</sup> Joan. viii,

pudicis viris; sed, « Qui sine peccato est : » quod si esse se dixerint, se ipsos seducunt, et veritas in eis non est<sup>3</sup>. Porro si non se seducunt, et est in eis veritas, non erit in eis cruenta severitas. Scientes enim se non esse sine peccato, dimittunt ut dimittatur eis; nec ab eis benignitas et pietas excluditur. Magis enim haec excluduntur, si peccatis conjugum ab eis impetrat veniam licentia libidinis, non cura pietatis, id est, ut propterea parcant quia licet eis alteras ducere, et non potius propterea quia volunt et sibi Dominum parcere.

XV. Quanto itaque melius, et honestius, christiana denique professione dignius, ut parcant adulterarum sanguini uxorum, quod scriptum est, eis dicimus : « Dimitte injustitiam proximo tuo, et tunc precanti tibi peccata solventur. Homo homini conservat iram, et a Domino querit medelam. Superhominem similem sibi non habet misericordiam, et de peccatis suis deprecatur. Cum ipse caro sit, conservat iracundiam, quis propitiabitur peccatis illius<sup>4</sup>? » Et de Evangelio : « Dimitte, et dimittetur vobis<sup>5</sup> : » ut possimus dicere : « Dimitte nobis debita nostra, sicut et nos dimittimus debitoribus nostris<sup>4</sup>. » Et de Apostolo : « Nulli malum pro malo redentes<sup>5</sup>. » Et si qua sunt hujusmodi in Scripturis sanctis, quibus, adulciscendum quando humanus animus excitatur, quia Christianus est, mitigatur. Quanto, inquam, melius ista dicimus, quam ut dicamus : Tantum adulteras istas dimittite, et earum nolite sanguinem querere : quidquid doloris ex earum flagitiis habetis, consolabuntur vos aliae quas duxeritis : merito enim velletis istas de viventium numero auferre, si earum vita impedimento esset, quominus alias duceretis; nunc vero, etiam istis viventibus,

<sup>1</sup> x Joan. i, 2. — <sup>2</sup> Eccli. xxviii, 2-4. — <sup>3</sup> Luc. vi, 27. — <sup>4</sup> Matth. vi, 12. — <sup>5</sup> Rom. xii, 17.

cum liceat alia vobis matrimonia providere , quid eas tantopere vultis occidere ? Hæc si dicimus , nonne attendis quam nostra suasio longe sit a charactere christiano : quia et falsum dicimus , eis licere quod non licet , hoc est , istis viventibus ut aliis copulentur ; et si propterea illis pepercernet , non parcent propter pietatem , sed propter aliarum nuptiarum liberam potestatem . Postremo quæro abs te , utrum marito christiano liceat vel secundum veterem Dei legem , vel Romanis legibus adulteram occidere ? Si licet , melius est ut ab utroque se temperet , id est , et a licto illa peccante suppicio , et ab illicito illa vivente conjugio . Quod si alterutrum eligere perseverat , satius est ei facere quod licet , ut adultera puniatur , quam id quod non licet , ut ipsa viva ille moechetur . Si autem , quod verius dicitur , non licet homini christiano adulteram conjugem occidere , sed tantum dimittere ; quis est tam demens qui ei dicat : Fac quod non licet , ut tibi liceat quod non licet ? Cum enim utrumque secundum legem Christi illicitum sit , sive adulteram occidere , sive illa vivente alteram ducere , ab utroque abstinentum est , non illicitum pro illicito faciendum . Si enim facturus est quod non licet , jam faciat adulterium , et non faciat homicidium , ut vivente uxore alteram ducat , et non humanum sanguinem fundat . Quod si est utrumque nefarium , non debet alterum pro altero perpetrare , sed utrumque vitare .

XVI. Hic video quid dici ab incontinentibus possit : quod videlicet qui dimittit et vivere permittit adulteram , si alteram duxerit , quandiu prior illa vivit , perpetuus adulter est , nec agit poenitentiam fructuosam a flagitio non recedens ; nec si catechumenus est , ad baptismum admittitur , quoniam ab eo quod impedit non mutatur ; nec reconciliari poenitens potest in eadem nequitia perse-

verans : si autem accusando adulteram occiderit , hoc peccatum quoniam transactum est , et in eo non permanet , et si a catechumeno factum est , baptismate abluitur , et si a baptizato , poenitentia et reconciliatione sanatur . Sed numquid propterea dicturi sumus adulterium non esse adulterium , quod sine dubio committitur , si conjugé adultera vivente altera ducitur ? Sed hoc adulterii genere excepto , nempe non dubitas esse adulterium , si quisquam ducat viventis uxorem a viro suo per libellum repudii sine ulla mulieris fornicatione dimissam . Quid ergo , cum vividerit se nec ad baptismum admitti , si catechumenus , nec utiliter agere poenitentiam , si baptizatus hoc fecit , non corrigendo et relinquendo quod fecit , si eum voluerit et potuerit occidere cuius duxit uxorem , ut hoc scelus vel baptismate diluatur , vel poenitendo solvatur , atque ita etiam illud adulterium non permaneat , evacuata muliere a lege viri post mortem viri , sed de transacto quod factum est , per poenitentiam satisfiat , vel regeneratione delectatur ; numquid propterea est accusanda lex Christi , tanquam compulerit fieri homicidium , cum sine crimine fornicationis repudiatam ducere , dicit esse adulterium ?

XVII. Hic enim , si parum quid loquamur attendimus , multo graviora dici possunt quam ipse dixisti . Nam tu dum non vis esse adulteria , si aliæ ducantur dimissis adulteris , hoc invenisti : « Quoniam si hæc adulteria dixerimus , cogentur mariti occidere adulteras , quarum vita impediunt alteras ducere . » Atque ut hoc exaggerares , dixisti : « Non mihi videtur , amantissime pater , hic divinus esse sensus , ubi benignitas et pietas excluditur . » Si ergo quispiam nolens credere esse adulterium quando a marito sine fornicationis crimine repudiata ab altero ducitur , et hoc contra te inveniat , quia ista ratione suadetur hominibus homicidia perpetrare , et earum maritos ,

quas eo modo repudiatis duxerint, vel insidiis quibus potuerint, vel calumniis appetere, vel aliquibus veris criminibus accusare et occidere, ut eis mortuis esse possint conjugia, quae vivis fuerant adulteria: nonne id exaggerando tibi dicturus est: Non mihi videtur, amantissime frater, hic divinus esse sensus, ubi non solum benignitas et pietas excluditur, sed etiam ingens malignitas et impietas excitatur? Quandoquidem multo est levius et tolerabilius, ut alteras mariti, quam ut maritos adulteri occident. Placet-ne tibi, ut propter vanissimam invidiam, dominicæ defensionem sententiæ deseramus, vel eam insuper accusemus, dicentes non debere adulterium vindicari, etiamsi præter causam fornicationis repudiata a viro alteri conjugetur, ne maritum ejus a quo dimissa est compellatur occidere, dum adulterium in conubium cupid viri prioris morte convertere? Scio hoc tibi non placere, ut propter hanc vanissimam invidiam, lex Christi, cum vera inveniatur et sana, dura et inhumana dicatur. Sic itaque non tibi debet videri ideo negandum esse adulterium, quando uxore adultera vivente altera ducitur, quia potest maritus per hoc cogi adulteram occidere, dum cupid sibi licere illa extincta alteram ducere, si hoc ea vivente non licet facere. Quid si enim et illud dicant christianæ fidei detractores, cogi homines occidere uxores suas insidiarum sceleribus, quas molestas ferre non possunt, sive diuturno languore laborantes et pati concubitum non valentes, sive pauperes, sive steriles, sive deformes, aliarum spe ducendarum, sanarum, opulentarum, foecundarum, pulcherrimarum: quia eas quas perpeti nolunt, præter causam fornicationis repudiare non licet, et alteras ducere, ne perpetuo devincti adulterio, nec baptizari possint, nec poenitendo sanari. Numquid propterea ne ista homicidiorum scelera perpe-

trentur, dicturi sumus, non esse adulteria, repudiatis præter causam fornicationis uxoribus, sibi alteras copulare?

XVIII. Jamvero ex hoc quod sapis non esse adulterium, si vir uxorem causa fornicationis abjecerit, et alteram duxerit, nonne arbitraris cavendum, ne discant viri uxores suas, quas propter alias innumerabiles causas ferre non possunt, moechari cogere, ut ab eis vinculo conjugal per fornicationem, sicut putas, soluto, liceat eis alteras ducere; et ex eo quod illas moechari coegerunt, aut baptimate ablui, aut poenitendo sanari, quoniam illis et gratia et medicina negabitur quandiu cum adulteris vivent, si prioribus præter causam fornicationis repudiatis alteras duxerint? Nisi forte quis dicat, neminem posse uxorem suam moechari facere, si pudica est: et tamen Dominus: « Omnis qui dimiserit, inquit, uxorem suam, » præter causam fornicationis, facit eam moechari. » Utique propterea, quia cum esset pudica cum viro, tamen dimissa cogitur per incontinentiam vivo priore alteri copulari, et hoc est moechari. Quod si hoc ista non fecerit, tamen ille quantum in ipso est facere compulit, et hoc ei Deus peccatum, etiamsi illa casta permaneat, imputabit. Sed quis nesciat quam sint rarissimæ, quæ ita pudice vivant cum viris ut etiamsi ab eis dimittantur, alios non requirant? Incomparabiliter quippe numerus est amplior foeminarum, quæ cum pudice adhaereant maritis, tamen si dimissæ fuerint a maritis, non differunt nubere. Cum ergo crediderint homines Domino dicenti: « Omnis qui dimiserit uxorem suam, præter causam fornicationis, facit eam moechari<sup>1</sup>; » si crediderint et tibi dicenti muliere fornicante licere viro ejus alteram ducere; quisquis voluerit propter alias quaslibet molestias

<sup>1</sup> Matth. v, 33.

carere uxore cui junctus est; prius eam moechari faciat sine fornicatione dimittendo, ut tunc ducat alteram, cum fuerit illa moecha nubendo: ac sic a priore peccato quo eam moechari fecit, sive per baptismum, sive per poenitentiam liberatus, sine suo adulterio sibi habere videatur, quam post prioris adulterium tanquam hinc soluto matrimonii vinculo, alteram duxerit. Quod quidem si fuerit machinatus, et uxorem suam moecham faciet, et ipse quamvis post adulterium conjugis aliam ducendo moechus erit; nihilque illi proderit quod tibi credidit, et non ei potius qui nullo excepto ait: « Omnis qui reliquie rit uxorem suam, et aliam duxerit, moechatur<sup>1</sup>. »

XIX. Quibus omnibus consideratis atque tractatis, restat ut ab eis qui haec fideliter audiunt, dicatur nobis quod Domino dictum est: « Si talis est causa cum uxore, non expedit nubere. » Quibus et nos quid respondeamus, nisi quod ipse respondit? « Non omnes capiunt verbum hoc, sed quibus datum est. Sunt enim eunuchi qui de matris utero sic nati sunt, et sunt eunuchi qui facti sunt ab hominibus, et sunt eunuchi qui se ipsos castraverunt propter regnum cœlorum. Qui potest capere, capiat<sup>2</sup>. » Ergo qui potest capiat, quod non omnes capiunt. Possunt autem capere hi quibus hoc præstat Dei misericordia occulta, sed justa. Sed in his omnibus qui se ipsos castraverunt propter regnum cœlorum, alii sunt qui in utroque sexu concubitum nesciunt, alii qui experti et aversi sunt, partim quidem illicite, partim vero licite experti. Porro in his qui licite experti sunt, quidam sunt qui non nisi licite, quidam et illicite et licite. Sunt quippe in eis qui conjugia sua tantum sciunt; sunt autem qui et alias feminas ac supra quælibet. Sed qui post concubitum conjugum se ipsos castrant propter regnum cœlorum,

<sup>1</sup> Luc. xvi, 18. — <sup>2</sup> Matth. xix, 10-12.

aut morte amittunt conjuges, aut ex consensu cum eis continentiam profitentur, aut ex necessitate divoriorum, ne vivis conjugibus se aliis copulando adulteria perpetrent, castrant se ipsos propter regnum cœlorum, non ut clariores ibi esse possint, sed quod aliter ibi esse non possint: nam qui non ista necessitate se continent, sed boni appetitione melioris, possent ibi esse, etiam servata pudicitia conjugali, quamvis in præmiis minoribus, tamen intus. Qui vero propterea se continent, quia prioribus conjugibus vivis continent aliis conjugari, majorem curam debent gerere pro salute, quam gesserunt illi a quibus continentia pro munere delecta est ampliore. Tunc quippe ibi erunt, si adulteri non erunt. Si autem non continent, adulteri erunt; quia vivenibus conjugibus pristinis, non conjugibus alteris, sed adulteris adhærebunt. Et si a regno cœlorum absurunt, ubi erunt, nisi ubi salvi non erunt?

XX. Hos igitur alloquor, ut quod facere deberent, si haberent conjuges diuturno languore marcescentes, vel loco sibi inaccessiblem absentes, vel animositate illicita continentis; hoc faciant, si habuerint conjuges adulterina inquisitione sordentes, et propter hoc a suo consortio divoriantes: non alia querant conjugia, quia non erunt conjugia, sed adulteria. Cum enim par forma sit in hoc vinculo viri et uxoris, sicut uxor « Vivente viro » vocabitur adultera, si fuerit cum alio viro<sup>1</sup>, ita et vir vivente uxore vocabitur adulterus, si fuerit cum alia muliere. Etsi enim gravius qui præter causam fornicationis: « Omnis tamen qui dimiserit uxorem suam, et aliam duxerit, moechatur<sup>2</sup>. » Non eos terreat sarcina continentiae: levis erit si Christi erit; Christi erit, si fides aderit, quæ impetrat a jubente quod jusserit. Non eos frangat, quod videtur eorum continentia necessitatis

<sup>1</sup> Rom. vii, 3. — <sup>2</sup> Luc. xvi, 18.

esse, non voluntatis: quia et illi qui eam voluntate delegerunt, fecerunt eam esse necessitatis; quoniam jam sine damnatione ab illa deviare non possunt: et qui in eam necessitate contrusi sunt, faciunt eam esse voluntatis, si non de se ipsis, sed de illo a quo est bonum omne confidunt. Illi ad eam concenderunt causa majoris gloriæ, ut aliquid amplius invenirent; Isti ad eam confugerunt cura salutis novissimæ, ne perirent: utrique permaneant, utriusque in quod pervenerunt ambulent usque in finem, ferveant studiis, supplicant votis: quia et illis salus cogitanda est, ut ab eo quod voluntas arripuit cedere timeant; et istis gloria desperanda non est, si in eo quod necessitas intulit, persistere deligant. Fieri enim potest, ut Deo terrente et hortante, convertente et implente, humanus in melius mutetur affectus: atque ita voveant sine conjugiis et sine ullo concubitu atque immunda libidinis attractione perseverantissime vivere, ut etiamsi separata conjugia locum ducendi alias moriendo aperuerint, claudatur ex voto quod patet ex licto, et quod erat necessitate coemptum, fiat charitate perfectum. Talibus profecto id retribuetur, quod illis qui vel pari consensu cum conjugibus hoc voverunt, vel nullis conjugiis alligati propter majus bonum continentiam delegerunt. Si autem ita se continent, ut si moriantur quarum vita conjugari impediuntur, alias ducere cogitent, profecto etiamsi prius ipsi in tali continentia de corpore abscedant, non eis imputatur nisi ad pudicitiam conjugalem, propter quam non faciunt quod facherent si licaret. Hac quippe intentione continenter vivere, parum est ad accipienda illius quæ liberius eligitur continentiae præmia, sed sufficit ad cayenda adulteria.

**XXI.** Hæc autem me de utroque sexu memineris dicere; sed maxime propter viros qui propterea se foeminis

superiores esse arbitrantur, ne pudicitia pares esse dignentur: in qua etiam præire debuerunt, ut eos illæ tanquam sua capita sequerentur. Quando autem lex prohibet adulteria, si obtentu incontinentiæ carnalis infirmitatis admittatur excusatio, multis sub nomine falsæ impunitatis pereundi aperitur occasio. Neque enim carnem non habent foeminæ quibus viri aliquid tale nolunt licere, quasi eis quia viri sunt liceat. Sed absit ut melioris sexus tanquam honori debeatur, quod pudori detrahitur; cum honor justus virtuti, non vitio debeatur. Quinimo cum a foeminis utique habentibus carnem, tantam flagitant castitatem, ut quando ab uxoribus diutissime peregrinantur, velint eas ab adulterino concubitu incontaminatas fervorem transigere juventutis; (et plurimæ pudicissime transigunt, et maxime Syræ, quarum mariti negotiandi quæstibus occupati, juvenes adolescentulas deserunt, et vix aliquando senes ad aniculas revertuntur:) eo ipso evidentius convincuntur non esse impossibile, quod se non posse causantur. Si enim hoc non posset infirmitas hominum, multo minus id posset sexus infirmior foeminarum.

**XXII.** Unde istos, qui virilem excellentiam non putant nisi peccandi licentiam, quando terremus ne adulterinis conjugiis hærendo pereant in æternum, solemus eis proponere etiam continentiam clericorum, qui plerumque eamdem sarcinam subeundam capiuntur inviti, eamque susceptam usque ad debitum finem, Domino adjuvante, perducunt. Dicimus ergo eis: Quid si et vos ad hoc subeundum popolorum violentia caperemini, nonne suspectum caste custodiretis officium, repente conversi ad impetrandas vires a Domino, de quibus nunquam antea cogitastis? Sed illos, inquiunt, honor plurimum consolatur. Respondemus: Et vobis timor multo amplius mode-

retur. Si enim hoc multi Dei ministri repente atque inopinatae impositum suscepserunt, sperantes se illustrius in Christi haereditate fulgere; quanto magis vos adulteria cavendo vivere continenter debetis, metuentes non in regno Dei minus lucere, sed in gehenna ignis ardere? Hæc atque hujusmodi eis ut possumus dicimus, qui quoquo modo a se discedentibus vel propter adulterium dimissis conjugibus suis, alias volunt ducere, et cum prohibentur, infirmitatem **nobis** carnis opponunt. Sed jam liber etiam iste claudendus **est**, et rogandus Deus, ut aut eos tentari non sinat separationibus conjugum; aut ita sinat, ut timor periclitantis salutis fiat illis amplioris sive probationis occasio **castitatis**.

## S. AUR. AUGUSTINI

HIPPONENSIS EPISCOPI

### DE MENDACIO

LIBER UNUS<sup>1</sup>.

IN QUO QUID SIT MENDACIUM, ET UTRUM ALIQUANDO ADMITTENDUM SIT, EXEMPLIS MOMENTISQUE RATIONUM IN UTRAMQUE PARTEM LIBRATIS DISQUIRITUR. MENDACIORUM AFFERUNTUR OCTO GENERA, HISQUE DISCUSSIS ET OMNINO REJECTIS STAUTUR NUNQUAM ESSE MENTIENDUM.

I. MAGNA quæstio est de Mendacio<sup>2</sup>, quæ nos in ipsis quotidianis actibus nostris sæpe conturbat: ne aut temere accusemus mendacium, quod non est mendacium; aut arbitremur aliquando esse mentendum, honesto quodam et officioso ac misericordi mendacio. Quam quæstionem tam sollicite pertractabimus, ut quæramus cum quærentibus: utrum autem aliquantum inveniamus, nihil nobis temere affirmantibus, lectori bene attendenti satis indicabit ipsa tractatio: latebrosa est enim nimis et quibusdam quasi cavernosis anfractibus sæpe intentiōnem quærentis eludit; ut modo velut elabatur e manibus quod inventum erat, modo rursus appareat, et rurus

<sup>1</sup> Scriptus circiter annum Christi 395. — Vide Re tract. lib. 1, cap. ultim.

<sup>2</sup> Vide D. Guillon, tom. xxii, p. 340-343.